



20. august 2012

UKA 2012/152

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kingusinnerpaamik UPA 2013-imut Qasigiannguani Efterskole Villads Villadsenimi atuartut 20-nik amerlatigisunik ilasinnaanerannik Naalakkersuisut misissuinissaannik peqqunneqarnissaannik Inatsisartut aalajangiiffigisassaattut siunnersuut.

(Inatsisartunut ilaasorta, Kristian Jeremiassen, Siumut)

Tunngavilersuut:

Inuusuttuaqqat periarfissaat atuartitaanikkut nunatsinni naammattut pigisariaqarpavut. Ukioq kingulleq atuarfiusoq efterskolinut iserniarlutik itigartitaasut 145-put, inuusuttuaqqallu taakkua ingerlariaqqinnissaannut itigartitaanerat ilinniartitaanerup qaffassarneqarneranut tulluutinnigilaq.

Nunatsinni ilinniartitaanerup qaffassaaffigineqarnera annertuujuvoq, inuusuttuaqqallu periarfissallit sapinngisamik tamaasa ingerlariaqqinnissaannut periarfissittariaqarpagut taamaangippat ilinniagaqarnissamat piumassusaat annikillisinneqarsinnaanera ernumanartoqartippara. Qasigiannguanilu periarfissaq pingineqarpoq efterskolip allilerneqarsinnaanera taamaalilluni atuartoqarnerulersinnaa-voq inuusuttuaqqanut Kalaallilu Nunaanut iluaqutaasumik, isumaqarpungalu periarfissaq tamanna atorluartariaqartoq inuusuttuaqqat pitsaasumik periarfissikkumallugit.

Ilinniartitaaneq qaffassaavigineqartariaqarpoq nunarput pitsaasumik sullinneqarnissaa siunertaralugu, inuusuttuaqqallu taakkuupput kinguaariinnik ingerlatitseqqittussat taamammat kikkulluunniit tamaasa pisariaqartippagut ilinniagaqarsimasut nunarput siunissami ajunngitsumik ingerlaqqullugu, nukit nutaat piumassusilillu iluatigisariaqarpagut siunissarput eqqarsaatigalugu.

Neriuppunga pigisavut nukittorsassagigut Qasigiannguanilu Efterskole atuartut 20-nik amerlatigisunik ilasinnaanerannik Naalakkersuisut misissuinissaannik peqqunneqarnissaannik Inatsisartut aalajangiiffigisassaattut siunnersuut Inatsisartuni ilaasortat ataatsimoorfigiumaaraat inuusuttagut eqqar-saatigalugit.

Pisortanut aningaasaqarnikkut aqutsisoqarnikkullu kingunissai:

Annertunerusumik pisortat allaffissornikkut ingerlatsineranut sunniuteqassannilaq.

Suliffeqarfinnut namminesortunullu kingunissai:

Sunniuteqassannigilaq

Innuttaasunut aningaasaqarnikkut aqutsisoqarnikkullu kingunissai:

Sunniuteqassannigilaq